

Geiq Mbwt Rangz



Seizcin byajraez yiengj “lungz lungz”, fwn-doek yiengj “sa sa”, fwn-doek gvaqlaeng rangzcin yaemzyaemz daj ndaw namh conh okdaeuj. Neix dwg mwh ndei mbwt rangz!

Seizcin gou caeuq gyoengq doengzbangh byaij youq gwnz Bya-gyungzlungz, itloh ngafaex haiz loeg, vamoq hai hoengh, duz roeg cijcij cetcet, gij yiengh gingjsaek gyaundeihawj dou roxnyinh haengjheiq. Dou benz daengz dingjbya le yawjraen benq ndoengfaiz mwncup ndeu, lumj benq haij loegsaek ndeu, rumz ci gvaq, ndoengfaiz fubfab baenz langh, fatok sing “sa sa” gig ndeidingq, caen dwg hawj vunz simsoeng. Dou couh gingheij cung haeujbae, siengj gorangz ndeigyaez couh lumj duz cinglingziq ityiengh ndoj youq laj faiz, caj dou bae ra ne!

Dou dawz fagso iq dauqcawq ra, hoeng baenzlawz hix ra mbouj raen! Yienghneix dou couh bomq youq gwnz namh dauqcawq yawj, hoeng gyoengqde lumj daenj buhyo’ndang nei, ndoj youq laj goekfaex caeuq namh, caeuq dou goemqndoj ne! Gvaq yaep ndeu, gou cungjsuenq youq henz gofaex hung ndeu fatyienh le aen “gyaeuj iq” loeg ndeu

lumj dwg ngamqngamq soemh okdaeuj nei, gipmuengz heuh: “Vaiq daeuj yawj, gizneix lumj miz gorangz iq ndeu!” Gyoengq doengzbangh cungj angq-faengz buet gvaqdaeuj, humx baenz aen gien ndeu, ndawde miz lwg doengzbangh ndeu cigciep aeu fwngz rag, hoeng gorangz iq mbouj doengh saekdi. Yienghneix dou sien aeu fagso youq gwnz namh veh gien luenz ndeu, yienzhaeuh mbwt namh henz gorangz ok, siujsim sisi daj ndaw namh rag gorangz okdaeuj. Yienzlaiz mbwt rangz hix mbouj dwg gienh saehcingz genjdanh ndeu ha! Miz le baez gingniemh neix, dou youh ra ndaej le geij duz “cinglingziq”. Gou rox, moix baez ra ndaej gorangz cungj dwg mbwn ndij namh hawj gij gingheij hawj dou.

Mbwn ciemhciemh laep roengz-daeuj lo, yawjyawj gij lwgrangz miz hung miz iq, miz maenh miz reg, caiq yawjyawj gij haiz dou nem rim namh, daihgya nyaenx mbouj ndaej sim’ angq riu lo! Neix dwg mbwn ndij namh soengq hawj ne!

(Gyanghsuh Swngj Vaigozyij
Yozyau Gu Sinhyij/raiz Lij Yangh-
lenz/hoiz)

Hag Gwih Danci

Muengh ha muengh ha, muengh bae muengh dauq muengh ndaej aen danci gou daengz lo. Gou youh sim’ angq youh dungxmbouq. Gou sim’ angq, dwg aenvih gou dauqdae miz aen danci bonjfaenh lo; gou dungxmbouq, dwg gou lau hag gwih mbouj rox baenzlawz guh.

Byai singhgiz, gou caeuq daxboh daxmeh caemhcaez daeujdaengz gunghyenz. Gou caj mbouj ndaej lo, couh simgip dwk gwih hwnj gwnz danci bae, bouxlawz rox ngamq gwih hwnj bae couh laemx dwk seiq ga daengj mbwn. Seizhaenx caekhaex gou manhsaengsaeng, in dai bae! Yawj daeuj, gwih danci mbouj ngaih lumj gij gou ngeix baenzde.

Daxboh guh baez yiengh ndeu hawj gou, gaenlaeng youh son gou hag gwih. Baeznduj, gou yungh song fwngz gaem gyauejci maenhmaenh bae. Liuxle, gou gaswix baez hamj, yungh rengz hamj gvaq daengq danci, caekhaex nod naengh roengz bae. Naengh hwnj gwnz danci gou gaswix dieb youq gwnz gaiq diebdin baihsuix, ga’ gvaz cengj youq gwnz dieg, da yawj baihnaj. Gaenlaeng yungh gaswix caij gaiq diebdin, ga’ gvaz cengj gwnz dieg. Gou haenq-rengz haenqheiq, diem amq heiq naek ndeu, haenqrengz caij gaiq diebdin, danci cungj suenq ndaej byaij bae naj lo. Daxboh itcig youq baihlaeng rex danci, bang gou gaem maenh dawz bingz. Lienh ha lienh ha, gou laebdaeb lienh baenz buenqngoenz.

Yienznaeuz baezneix gou mboujcaengz hag rox gwih ndei, hoeng gou saenq, goengfou mbouj gaz boux miz sim, gou itdingh hag rox gwih danci.

(Gyanghsuh Swngj Danhyangz Si Sizyen Siujoyz
Ngeih(10)Ban Ciengj Cwngzyingh/raiz Veiz Yen’ gyangz/
hoiz)



Gij Angqyangz Roek Benq Dangz

Gou maij yiengh dangz ndeu dangqmaz. De heuhguh dangz-bakhom, gwn hwnjdaeuj couh lumj makdauz youq ndaw bak menh-men yungzvaq baenz raemx makdauz, ndeigwn dahraix!

Dangzbakhom caen dwg ndei gwn lai lo. Miz haemh ndeu, gou gwn benq doq benq, gwn dwk daengx mbouj ndaej. Cigdaengz ngamq lw roek benq le, gou cij sim’ in dwk daengx roengzdaeuj, ndaep daeng ninz lo. Haetlaeng hwnqdaeuj, gou sij mbouj ndaej mbatdog gwn liux roek benq dangz neix, siujsim riri dawz gyoengqde bungj daeuj ranzhag, dajsuenq youq ndaw gyausz menhmenh cimz

gwn.

Mwh gou cingq naengh dingh youq baihnaj congzsaw, ngamq yaek gwn dangzbakhom, gyoengq doengzhag yawjraen gij baujboiq gou lo. Gyoengqde cungj yawj coh fwngz gou, cim daengz gou cungj miz di najremj lo. Gou dawz fajfwngz gaem dangz haenx daj henz bak cuengq roengzdaeuj. Ndaw sim gou lumj bonjfaenh gou miz song ndang nei, cihgeij caeuq cihgeij doxbuek. Boux ndeu hoz-ndat dwk naeuz: “Neix mingzmingz dwg gij dangz gou! Vihmaz aeu baen hawj bouxwnq?” Lingh boux cix oksing nyieg dwk fanjbuek: “Hoeng mizseiz gyoengq doengzhag

hix rox faenyienj gij ndeigwn swheij daiq daeuj haenx.” Doeklaeng song boux cihgeij gou caezhoz lo: “Gag angq beij mbouj ndaej cungqvunz cungj angq, baen ba!”

Yienghneix, gou dawz roek benq dangz neix baen okbae. Yawj gyoengq doengzhag gwn dangz le gwnz naj riunyumj riuangq, ndaw sim gou hix angqyangz raixcaix.

Laxlawz, neix couh dwg gij angqyangz roek benq dangz!

(Gyanghsuh Swngj Bihcouh
Si Yinhoz Gauhdwnj Swhfan
Yozyau Fusuz Siujoyz Ngeih
Nienzgaep Dingh Sannoz/raiz
Lij Lungzfangh/hoiz)

